

Иса Месихнинъ догъулувы

1 Окунълери хайсер Август бутюн падишалыгъында халкъ сайымы япылсын деген ферман чыкъарды. 2 Шай этип, Суриде Кириний укъумдарлыкъ япкъан заманда биринджи дефа эалини джедвельге чектилер. 3 Эр кес язылмакъ ичюн озъ шеэрини кетти. 4 Юсуф да, Давутнынъ союздан олгъаны ичюн, Джелиленинъ Назира шеэринден чыкъып, Еудие мемлекетине, Давутнынъ шеэри олгъан Бейтлеэмге барды. 5 Анда о юкю къадыны Мерьемнен бирликте язылдыжакъ эди. 6 Тамам олар анда экенде, Мерьемнинъ бала догъураджакъ вакъты-саати кельди. 7 Мерьем ильк огълуны догъурды. Оны къундакъкъа сарды, ашлавгъа яткъызды. Чюнки оларгъа мусафирханеде ер тапылмагъан эди. 8 О мемлекетте айван сюрюлери янында невбет тутып, геджелерини чельде кечирген чобанлар бар эдилер. 9 Апансыздан оларнынъ огюнде Раббининъ бир мелеги пейда олды. Этрафны иляий бир нур яп-ярыкъ этти. Чобанлар буюк къоркъугъа тюштюлер. 10 Мелек оларгъа: «Къоркъманъыз! — деди. — Мен сизге эр кесни гъает севиндиреджек Мужде кетирдим. 11 Бугунъ Давутнынъ шеэринде сиз ичюн Къуртарыджы догъды, О да Раббимиз Месихтир. 12 Иште, сизге Онынъ ишарети: къундакъкъа сарылгъан, ашлавда яткъан бир баланы тападжакъсынъыз». 13 Шу анъ мелекнинъ янында Танъры хызметчилерининъ буюк бир ордусы пейда олды. Олар Танърыны алгъышлап шойле дедилер: 14 «Кок юксекликлеринде Танърыгъа шан-шурет олсун, ер юзюнде исе яхшылыкъ тилеген инсанлар арасында барышыклыкъ олсун!» 15 Мелеклер чобанлар янындан кетип, кокке чекильген сонъ, олар бир-бирлерине: «Айды Бейтлеэмге барайыкъ, Раббиден бизге бильдирилген шейлерни бакъайыкъ», - дедилер. 16 Аджеле кетип, Мерьемнен Юсуфны ве ашлавда яткъан Баланы таптылар. 17 Оларны корюп, бу Бала акъкъында эшиткенлерини оларгъа бильдирдилер. 18 Буны динълегенлернинъ эписи чобанларнынъ лафларына шаштылар. 19 Мерьем исе бутюн бу сёзлерни теренден тюшюнип, юрегинде

сакълады. 20 Бундан сонъ чобанлар эшиткен ве корьген шейлери ичюн Танърыны алгъышлап ве макътап кери къайттылар. Эр шей оларгъа бильдирильгени киби чыкъкъан эди.